

Las scargadas ein tschercadas

Diversas alps sursilvanas insceneschan scargadas attractivas

DAD ANDREAS CADONAU

■ **Las scargadas valan sco punct culminont dalla stad alpestra. En divers loghens en Surselva ein quell'as scargadas sesviluppadas ad in event public che attrai bia publicum. Biestga bein ornada ed il scadanem da plumpas e bransinas valan sco attracziun. La proxima fin dalla jamna scargan Breil e Sagogn.**

«Nossa scargada posseda ina liunga tradiziun.» Adrian Seiler presidescha la cumissiun d'alp responsabla per ils fatgs alpesters ella vischnaunca da Breil. La tradiziun han puras e purs da Breil sviluppau el decours dils onns vargai ad in event attractiv ch'attrai onn per onn dabia publicum a Plaun Rueun. «L'attractivitat dalla scargada da Breil ei carschida enaquella che nus essan sedecidi da concentrar l'arivada dalla biestga da tuttas alps a Plaun Rueun.» Aschia arrivon biebein 600 tgas biestga da tschun differentas alps el liug da fiasta daddo il vitg da Breil. Per plascher dil publicum che deriva da lunsch e da maneivel. Il president dalla cumissiun d'alp schazegia che varga 600 personas visetien la scargada da Breil. «Bia gliud dalla regiun, mo era hosps da vacanzas.» Adrian Seiler ha udiu da hosps che reservan in dormitori in en ni l'auter hotel da Breil aposta per la scargada. Sche pusseivel vegn la scargada da Breil organisada ina sonda ed ils davos onns ei la finamira gartegiada. Laura ha dau suatientscha als giavischs da purs e fumeiglia d'alp. E las perspectivas meteorologicas ein empermettentas quei che pertucca la scar-



Las scargadas da Breil e Sagogn han liug la sonda proxima e quella da Flem ina jamna pli tard, ils 19 da settember.

FOTO A. CADONAU

gada dalla sonda proxima dils 12 da settember. Secapescha che bia mauns ein basigneivels per instradar la scargada, principalmein per preparar ils tschupials. La vischnaunca da Breil dumbra 22 mena-

schis e tuttas puras e tuts purs ein involvai. La veglia da collaborar ei avon maun, sco quei che Adrian Seiler ha dau d'entellir, aschia che la tradiziun dalla scargada da Breil ei segirada.

Cautegia e sulet pur

Cun meins gidonters sto *Gion Beeli* da Sagogn organisar sia scargada. El ei il sulet pur da Sagogn e dapi 27 onns cautegia dalla Alp Sogn Martin. L'organisaziun dalla scargada schai en ses mauns e Gion Beeli sa quintar cun divers gidonters, principalmein quei che pertucca la preparaziun dils tschupials. Era el ha menziunau la tradiziun dalla scargada da Sagogn che hagi adina menau la biestga dall'alp entochen en vischnaunca. Dapi entgens onns succeda la scargada dalla Alp Sogn Martin cun la fiera dil vitg. Ina cumbinaziun che seigi secumprova e che gaudi dabia atenziun. «Il termin dalla scargada ei fixaus ed encunoschents bunamein gia a caschun dalla scargada.» Per plascher dalla fumeiglia e dils organisaders e visitaders dalla fiera dil vitg ei Gion Beeli prompts da s'engaschar per la scargada. Biebein la mesadad dalla biestga ch'arriva sonda suentermiezgi a Sagogn s'auda al cautegia. Purs dallas vischnauncas vischinontas corgan medemamein biestga sin l'alp da Sagogn ed entgens lain marschar lur armauls il gi dalla scargada entochen el vitg per porscher al publicum in'andanta scargada ed era per plascher dalla fumeiglia. Fetg cuntents ei il cautegia dalla Alp Sogn Martin cun la stad passada ed era el spera cun bun'aura per dar alla stad ina digna fin.

Entochen 2000 visitaders

In grond resun ha la scargada dalla Alp dil Crap da Flem retschert avon diesch onns cun la viseta digl emettur tudestg ZDF a

Bargis. Entochen lu vegnevan bein entginas vacas ornadas e retschevevan ina plumpa ni l'autra sin via giu dil Crap da Flem, ha il cautegia *Gian Januth* tradiu. Oz visetan en media 1800 entochen 2000 aspectaturs la scargada da Flem. Il viadi dalla Scala Mola giu entochen Bargis vala per spectaculars ed il suentermiezgi cuntinua la muaglia il viadi entochen Flem. Gian Januth ha declarau che l'idea da lantschar quella scargada seigi vegnida dad in hosp da vacanzas. A caschun dalla emisiun dil ZDF avon diesch onns seigi la scargada aunc stada empau culissa per l'emisiun musicala. L'organisaziun turistica hagi exprimi il giavisch da cuntinuar. Biebein 175 vacas passentan la stad sin il Crap da Flem. Las biaras derivan da siat purs da Flem e dus da Trin. Autras dil contuorn ed entginas dalla Bassa. Embellir la muntanera ei caussa dils purs ch'els exqueschan da cuminonza cun la fumeiglia d'alp. Dasperas organischeschan ils purs a Bargis in menaschi d'ustria sin agen quen. Igl ulteriur menaschi schai els mauns dall'organisaziun turistica ch'instradescha ina vasta purschida cun divers solvers da purs. Per il viadi dalla Scala Mola giu basegna ei dd ulteriur sustegn che vegn organisaus dils purs e per part dalla fumeiglia. Tenor las explicaziuns da Curdin Januth san ils purs s'identificar cun la scargada, schegie ch'ella pretendi lavur supplementare. Era cul termin definaus ordavon ein ins entochen ussa vegnius bein a strada. Per il cautegia ei denton clar, sch'ei va buca sche ha il beinstar dalla biestga prioritad.

BALLAPEI

Evitar ulteriurs gols

(anr/gv) L'emprema da Schluain Glion retscheiva sonda Au-Berneck ch'ei il vischin dalla tabella e sin fundament dils emprems quater giugs era da medema posa. La differenza ei sulet quella ch'il proxim adversari ha gudignau ils dus davos giugs ferton che Schluain Glion ha spiaris quels. Quei vul denton dir nuot, pertegi ils dus davos adversaris dall'equipa d'*Urs Casutt* ein ils emprems dalla tabella e favorits da gruppa. En scadin cass sto Schluain Glion empruar da rinforzar la defensiu. Ils dudisch gols dils davos dus giugs ein stagn biars.

Giugs dalla proxima fin d'jamna

2. ligia, gruppa 1
Rorschach – Vaduz sonda, 17.00

Montlingen – Weesen sonda, 17.30
Schluain Glion – Au-Berneck sonda, 18.00
Rapperswil-Jona – Rebstein dumengia, 16.00

4. ligia, gruppa 2
Lai/Valbella – Laax sonda, 17.00
Domat – Linth 04 sonda, 17.30
Mels – Uznach dumengia, 10.00
Danis-Tavanasa – Val dumengia, 15.00
Trun/Rabius – Schluain Glion dumengia, 15.00

5. ligia, gruppa 2
Lumnezia – Schluain Glion sonda, 17.00
Union Trin – Razén sonda, 17.00
Sedrun/Mustér – Bogn Ragaz sonda, 17.00
Panaduz – Trun/Rabius sonda, 18.00
Danis-Tavanasa – Rueun sonda, 19.30

Juniors B promoziun, gruppa 1
Altstätten – Surselva sonda, 13.00

Appenzell – Domat sonda, 15.30
Mels – Tusaun/Cazas sonda, 16.00

Juniors C1, gruppa 1
Valposchiavo – Surselva sonda, 14.00

Juniors C2, gruppa 1
Surselva – Sargans sonda, 11.00
Cuera – Balzers sonda, 12.00
Tusaun/Cazas – Panaduz sonda, 14.00
Vaz-sut – Lai/Valbella sonda, 15.00

Juniors D9 elita, gruppa 1
Surselva – Widnau sonda, 11.00
Altstätten – Tusaun/Cazas sonda, 11.30

Damas 4. ligia, gruppa 1
Flums – Tusaun/Cazas dumengia, 14.00
Vaz-sut – Schluain Glion dumengia, 16.00
Panaduz – Schaan dumengia, 17.00

MUSTER

Gie alla revisiun parziala dalla planisaziun locala

(anr/hh) Il cussegl da vischnaunca da Mustér ei sefatschentaus la mesjamna sera dalla revisiun dalla planisaziun locala. Ella pertucca ina nova zona da mistregn a Pignola/Marias, ina zona speciala per in niv resort a S. Catrina ed in'adattaziun dalla zona speciala Disentiserhof. Parallelmein duei vegnir fatg arrundaziuns da terren sco era pintgas modificaziuns. A quella revisiun che cumpegia era ina revisiun parziala dalla lescha da baghegiar ha il cussegl da vischnaunca dau suatientscha. Differents puncts dalla revisiun han procurau per discussiun. Aschia ein

ins sedumandaus schebein igl ei prudent da nezegiar bien terren agricol sco a Pignola/Marias per edificis dil mistregn. Ina proposta da sparter quella part dalla revisiun dall'ulteriura ei denton vegnida refusada dil parlament. La votaziun dil pievel ha liug ils 29 da november 2015. Oriundamein era ei previu da suttametter la fatschenta gia ils 18 d'october 2015 al suveran. Tenor il president communal *Francescg Cajacob* vulan las autoritads denton dapli temps per puder informar la populaziun davart il project. Igl ei era previu d'organisar in'orientaziun publica.

RECLAMA

28.11.2015 | uni.li/infotag

GUT ZU WISSEN

- BACHELOR (BSc)**
 - Architektur
 - Betriebswirtschaftslehre
- MASTER (MSc)**
 - Architecture
 - Entrepreneurship
 - Finance
 - Information Systems
- DOCTORATE (PhD)**
 - Architecture and Planning
 - Business Economics

UNIVERSITÄT LIECHTENSTEIN

www.uni.li

Jamna bibliotecara 2015

■ **Gia per la tschunavla gada vegn menau atras en las bibliotecas dil cantun Grischun ina jamna extraordinaria. Il motto cummunabel da 2015 ei d'envidar ils deputai dil cussegl grond en biblioteca per in' occurrenza.** En Biblioteca Trun ei *Curdin Tuor* staus gliendisdis, ils 7 da settember sin viseta ed ha raquintau als pli pigns da nos visitaders la historia «dil grond sgol da Marmottin». Ils pigns, mo era ils gronds aspectaturs han tedlau cun buca aviarta.

Ins ha immediat sentiu che Curdin Tuor, ch'ei bab d'ina feglia da biebein dus onns ed in pop da treis meins, ei disaus da passentar cun els bein enqual uriala cun historias e cudischs. Silsuenter ha Curdin priu peda per discuorer culs carschi e tuts han astgau guder petta e caffè.

Bien engraziament per quei special e bi eveniment.

Per la Biblioteca Trun: Olivia Pfister-Tgetgel



El rom dalla jamna bibliotecara ha il suppleant da deputau Curdin Tuor prelegiu ella Biblioteca Trun.

MAD